



KBCI Thuso

Regd.No.19134/88
<http://www.kbc.org.in>
 NAI/220/99
 No-G-4/Regd.Magazine
 /KBCThuso/MNP-81

Kum 57 Ihinna

Ollha/December 2020



Kigoutohuon
JANUARY EVENTS

Finance Account Close - 08
 Sunday School Teachers' training - 19-22
 General Assembly - 25-29

"Kapa theng, eini pumkhat ihi bang a amaho jong
 pumkhat ahitheina ding un, Nangman amahohi hong in"

John. 17:11



Gambih No. 9 Pare Silver Jubilee lolhing tah in ana kibolchaitai



C in host abolding MBC Council chu
MBC Centre Church, Imphal mun ah lolhing tah in ana kichaitai



development noija project Lydia Resource Centre mun a
khat thilkhui na Certificate pehdohna ana kineiin ahi.

CONTENTS

THUMAKAI HO

Kipah a Kilemtona/ <i>Editorial</i>	2
Christmas toh kismakai ho/ <i>Rev. Onkho Haokip</i>	4
Bethlehem jotna lampi/ <i>Rev Lamkeng Lhouvum</i>	7
"Emmanuel" / <i>Rev Tongmang Haokip</i>	10
Christmas iti naman ding ham? <i>Rev. T. Thangkhosei Haokip</i>	12
PUM KHAT DINGA LHATDOH IHIUVE/ <i>Rev. Dr. M. Thongkhosei Haokip</i>	16
Mission Column	26
Development Column	29
Office Diary	30
Hetna Belap	36
Report	38
Obituary	43

EDITORIAL BOARD

<i>Chairman</i>	: <i>Rev. Tonglet Haokip, President KBC</i>
<i>Editor</i>	: <i>Dr. M. Thongkhosei Haokip, General Secretary</i>
<i>Joint Editor</i>	: <i>Rev. Onkho Haokip</i>
<i>Contributing Editors</i>	: 1. <i>Rev. Thongkhohun Touthang</i> 2. <i>Rev. Lamkeng Lhouvum</i> 3. <i>Rev. Tongmang Haokip</i> 4. <i>Pi Lhingbem Haokip</i> 5. <i>Rev. Lunkhosei Tuboi</i> 6. <i>Rev. T. Thangkhosei Haokip</i>
<i>Design & Layout</i>	– <i>Pu S. Lenboi Haokip</i>
<i>Circular Manager</i>	– <i>Pi Vahboi Baite</i>
<i>Recorder</i>	– <i>Ms. Nemhoichong Haokip</i>

THUSO LAHMAN

Church/Organisation/ DepartmentRs. 300/-
Individual Rs. 200/- (Post a Rs. 250/-)

Indian Overseas Bank, Imphal Branch

A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 70895979446 Contact thei.
Circulation to kisai lam Mobile No. 9862107393 bol ding.

Editorial...



Kipah a Kilemtona

Editorial

"Hijeh chun chihna lungthim kavop uva kahinkhou nijat kasim theina diu neihil un". Psalm 90:12

"Chuti ahijeh a chu ibonchauva Pathen henga eima chonchan iki-sei ding u ahi". Romans 14:12.

Amasatah in muntina um Kuki Christian chate jouse ahideh a KBC member ho jouse chung a Pakaiyu Jesu Christa minin salaam kahinpe cheh uve. Tulha thupi chu "Kipah a Kilemtona" kiti ahi toh kilhonin, hiche thudol ah chomcha ana ki-houlim u hite.

Kum kiheichin dungjuiyin phat le nikho ho ahung kitol tolin, tuhin kum kichai ding le kumthah galdot in aium thei tauvin kipa aumlheh e. Tukum vannoi leiset pumpi Coronavirus nat-

na hise China gama kona hung hidinga gin-chat chun alodimin, kichat, tijat keo hilouva thina le manna tampi aso tan ahi. Eimaho lah jenga jong hichea thi tin louthem doctor hon aseiyun ahile janthim-janlaiya mitamlouna a kivui ijat ham khat jong aumtan ahileh vangset aumlheh e.

Louthem langho seidanin, natna hi jatchomho banga hiche natna hi jong avel

nina a hung kit maithei ahin, amasa a sanga kho-hjo thei ahi atiuvin ahi. Atahbah in hiche kichatnan tuhin gam ijat ham in lockdown apan kit tauvin gam-le-gam kivena nahnah a kihongho jong tua hi hung kikhah kit dingin aum tai. Chuleh, eiho gam India le Manipur jeng jong kumthah a pat a hung kithah kha ding ham ti ginmo aum lleh tai. Hunglung hen hung lung tahih jong le government in SOP (Standard Operating Procedures) guideline apehho tichu – maitom kibu jing ding, apha she a khut sop theng jing ding, midang toh khut kituh a chibai bollou ding, japilah a chil set thang lou ding, etc. ti hi ichondanuva koi jing tah ding apha lleh tan ahi.

Alang khat a, hiche natna jeh hin gam pumpi lockdown aumtoh kilhonnin khopia um lekhasimho achengden ho tailou ama-ama kho ahin kijot cheh tauvin ahile khosunga mi aulin, honbol-loubol ahung tamtan, loubol natong hon jong kumlung keiya ana gimnahou jong aga ahin kilo pan tauvin kipah tah a kumlung ding agaldot u ahitai.

Ningkuma sang chun tukum hi thina muchi kitu jong atam cheh cheh tan, ichennau thinglung gam akeh khat tobang ahitan ahi. Hiche munho jouse hi phat sotlou leh mun in ahinkai gam na ding ahilah akicheh lleh jengin, ikhonung dingu ipi ihung hi diu ham lungdon aum lleh jenge. Tujengin jong state government sepai hon vatlhah ding kivaihopna anei jingun ahile kipana sanga lungjinna ahin pohlut ding ham akihepoi.

Bible in eihilnauva eiho jousen itohnau iki phon cheh diu ahi atihikhat umtah hinpontem? Thilpha bola natongho dingin vang kipana hinte. Chuleh, hinkho lampia adih le apha a chena dinga Labolpa taona hi eiho taona jong kistem cheh leuhen kipana le lolhinna kalbi hiding ham tihi ahi. Lunglut tah a sima tongdoh dia kigel lha jouse chung a Pathen vangpeh chang taken.



ARTICLE

Christmas chungchanga hetlouva khoh tampi aum-tah jeh in heloupum pum a iman sangun tuchung in hicheho thu hetkham kham in ana seikhom ute.

Christmas Thucheng

Christ (Christos, Greek)= Christa, Mass (mas, Heb.)= Jabolna, jana peh a lopna tina ahi. Christmas chun Christa Lopna ti a seithei jeng ahi. England te in Christes Masse atiuvin, Italy a umho in Natale atiuvin, French mite in Noel atiuvin, Hindi paovin Bad din akiti in, Kukite in Kumhei tin akou uvin ahi. Hiche Christmas hi abang in achomlam in X-mas tin jih jongleu isim tengleh Exmas tia seilouva (Xmas kijih jongleh) Christmas tia simdoh ding dol ahi.

Christmas Kum

Christa penkum ding hi BC 5 hidia ginchat umpen ahi. Hiche hi Heroh BC 4 a athi a kon a ki-hedoh thei ahi. Ajeh chu Herod thi masang a Jesu chu anapeng ahitai.

Christmas Nikho

Akihaman pen nikho hi December 25 ahin, Rome mite nisa pathen houna nikho ahi. German thinglhang mite an nekhomna nikho ahi. Persia mite nisa pa-

then houna ahi. Israel mite Han-nukkah kut man nikho hikha ji ahi. December 21 nikho hi nisa chom na ahijeh in nisa chu athi dinga agel uva ahivang a 25 nikhoa ahung saudoh kit jeh a lemna nikho ahi. Chomkhat jouvin Nisa pathen hilouva nisa hinsemdohpa Pathen chapa Jesu houna in ahung kimang tan, asetna umlou ahi. Thillui thilthah a kimang tobang, Ju bel chabel a kimang tobang ahi.

Advent Christmas

Jesu hung ding kigotna nikho-ho kiseina ahi. Advent Christmas mang dih pen a kihe chu Simon le Anna ahilhona. Tulaiyin vang Collge a student ho farewell programme tobang ahibep in thil kipehto na le golnop in aume.

Christmas Thingphung

Rome nisa pathen houna kibol anahi in, Winfrid missionary pa in Pathen houna lam a ahin heidoh ahi. Mimasaho gel dan in Christmas Thingphung (Xmas Tree) akikoi leh lhagao phalou adoudal e ana tiuvin ahi.

Christmas Thilpeh

Rome nisa pathen houna a thilpeh ana kipehto jiu banjom a Solam michingho in Jesu thilpeh afeh nauva kon a hung kiboldoh ahin khosung vengsun le houbung sung a Vaicha gentheihodinga thil kikhol a kipe ji chu Christmas Thilpeh ahi.

Santa Claus

German a hung kipan ahin Saint Nicholas minpu ahi. Duthch paova Sinterklass kiti chu English paova Santa Claus hung kiti doh ahi. Ama hin Xmas tengleh mivaichaho le chapangho kipa thilpeh afeh ji jeh a tuni gei a kimang den den a Christmaspa tia jong kihedoh ahi.

Christmas Greeting Card

1843 a John Calcott Horsley in

ahin pohdoh ahi. Jesu pen kipapina jal a lemnathu kithotto na ahi. Tulaiyin vang seasonal greeting card in aumdoh in Pathen houlouho gei in jong amangcha tauvin ahi.

Christmas Nehkhom

Jesu pen kipapina jal a nehkhom ana kibol ji ahi. Rome mite thilbol analahson u ahin nao andop dan a gel thei jong ahi. Tulaiyin kholen le khoneoho ding in aboitai. Hithei henlang Nao An-Dop hi anipi ni tengleh bou khoukhat bou kinekhom henlang adangho hi kihaisan thei jongleh asetna umsam lounel ding, kinavah jo a nomjo ding in akilang e.

Christmas Lhummei

Scandinavia miho pathen houna kilason ahi. Amahon thingtum lentah tah atih jiuvin aki-oikhom jiuve. Hiche hin mei leh keh lha hoa kon a mi avengbit e atijeh uva Christmas tengleh lhummei ana tiji u ahi.

Christmas Carol

Hou thudol a gollui la kiseum ho kiseina ahi. France paova "Carole" kiti hi english paova Carol a hung kiseidoh ahin AD 1200 kum vel a hung kipan ahi. Hiche hi Jesu pen kipana thuho midangho lungsunga suhHINGNA le tilkhounaa kimang ahi. Vantilho chu Carol la sa masapen ahitauve. Christmas jingkah a phat umlou sa sa le ihmutsah

sa sa a Carol che sang in Christmas kipat masang hapta khat hapta ni kah a nilhah seh leh inson chot a Carol la sah a mi suhthouvin phajo tante.

Christmas Changpol

Solam michingho Sangan an neh lim vetsahna chule gan angkong lim vetsahna ahi. Kukite in changpol aman jiu hi lenkhom a touna kimang ahikalval in adang imacha seimat pi thei aumpoi.

Thuchaina

Kum, Iha, nikho chule chondan umho hi mihem ten akipana jal uva anapohdoh uva hung pilhing ngen ahiuve. Hiche kibolho hi ajeh neicheh cheh ngen ahin hetchetset a pha ahi. Min mang jong leh eima dinga aphatchom

loule manlou a phajeng ahi. Bible a kon mong ahiloujeh in amangho jong amangcha louho jong koima akioimo pon phatchomna neipa chu alolhing ahijenge.

Tuchung Christmas iman ujong hi hiche iseiho hi ijop uva chule iman khompiu ahiye. Inop idauva michon dan dan a ichon nau tamtah um ahi. Aphatchomna tei dinga iman diu igel cheh diu kinep aume. Suhmil lou ding chu hicheho jouse gelsang beh a Jesu haimil ding hi kichat umpen chu ahi. Tukum i Christmas man u a chondan tampi imankhompilah uva hin alaiya Jesu umсах a dinsah ding in ikitem uve. Christmas a lai a Jesu hung ding hen! Amen.



Bethlehem jotna lampi

(Road to Bethlehem)

(Bible Luke 2:1-15)

~ Rev Lamkeng Lhouvum

Sermon

Thumakai :

Pakai kum 2020 hi vannpoi leiset pumpin boina sangpen Covid -19 pandemic ihin toh uvin, aha, avai chuleh aching athem khen louvin hiche boina chun nasa tahin vanoi ahot lignin ahi. Hiche hinkho iman lai tah u hin Christmas jong kimang thei lou ding hitam tia aki umlaijin, Pathen lungsetna amun amun'a programme ho kigon theija l um jallun Pathen kathang vah e. Hijeh chun chung a kahin tah lang "Bethlehem jotna Lampi" ti thupi mangchan kihoulimu hite.

1. Joseph leh Mary chena lampi:

Min sun dingin Bethlehem'a ache lhontan ahi. Nazareth a patna Bethlehem chu mile 80 lam'a sao lampi ahi. Sangan chung a tou ahijeh in ni 4 (4 days) lam jot inte akiti. Mary naovop ahin lha 9 lam alhingtan ahi. Joseph leh Mary chun akholjin na lhion chu leiset thusim'a tuni chanin kisei din tahsan lhonponte. Bible in ase chu nao so phat alhin phat chun atin ahi.

Bethlehem a Christa hung pen hin kikhelna lentah ahin polut in BC a konin AD a ahung kikhellin ahi. Pathen houte leh Pathen he pha louten jong, ahi lou leh Pathen aumpoi ti hon jong AD ati lou thei ahi tapon ahi. Mihem hon asim leh asim lou thu hilouvin Pathen in achapa a kon'a leiset kikhelna thusim ahin gon ahitai. Leiset thusim'a kikhelna lentah ahin pen ahi. Joseph leh Mary khol jinn a a hin eiho het phah lou thil gon Pathen in aneijin ahi. BC a patin AD a akikhellin ahi. Nahinkhoa jan muthim hinkho a konin Khovah hinkho namusah in, khovah hinkho napetan ahi. Bong in gan ankong sung'a Naosen Jesu alup bangin nangma lungsunga jong ahung pen nomin ahi.

2. Kelngoi ching ho lampi:

Kelngoi ching hon vantil ho thusei ana jaovin hichun Bethlehem jonin ana cheovin ahi. Pathen thupha najah a ahileh hoilang jon'a nache ji

em? Kelngoi ching ho chu Pathen kamcheng chu ajah phat nun akal song taovin ahi. Hiche thu hi moh koi thei ahipoi ti aheuvn ahi. Pathen thusei hon hitin anaseijun ahi. Hiche laitah chun Bongbuh tampi ana um ding ahi. Hijeh chun kelngoi ching te chun Bonbuh chu aban ban'a ahol diu ahi. Hol kiti tah beh'a ahol diu ahi.

Pathen ana holte chun Pathen amuvn, Pathen hol lout e jong Pathen in akou kouvin ahi. Kelngoi ching hon aga mudoh uve. Ponna kijel naosen chu a mutaove. Apon chu mihao hop on jong ahipoi. Pathen in nangma jong mi noinung pen pen dinmun'a kon'a nahung hol ahi. Tuni hin Bethlehem kho lam jon'a nangma toh kilhon anomin ahi. Kelngoiching ho thusei jap ha chan chun kidang asaovin ahi.

Hiche a kelngoi ching te hin ama ho kelngoi achinu ahipon, Jerusalem'a mihao ho kelngoi achinnu ahi. Amah o hi Sabbath nikho a houin kaiman loute ahiuve. Maicham kisemna a pang loute ahiuve. Amah o kisu thenga Houina Pathen hou thei te ahipouve. Amah hon kelngoi achin ho chu Jerusalem houin na kithoina kimang ji ahi. Tunin hiche maicham a kithat kelnoinou khel'a Maicham kithensona dinga Jesu hung peng ahi-tai. Pathen chun kelngoi nachin

ho Maicham a kithat ho khel din kachapa kahinsol ahitai ati Thupha chu ajaovin ahi. Kchapa nang ho din kahin pen ahi.

3.Solam miching te chena lampi :

Solam miching kiti hi Palestine a kon'a solam kiti na ahin, Iraq, Arabia ahilou leh India patna himai thei ahi. Mivaicha pen pen hon Jesu ana villun, mihao pen pen hon jong Jesu ana villun ahi. Tulaijin GPS (Global Positioning System) akimang theitan ahi. Miching te GPS chu van ahsi chu ahitan ahi. Amah o hin nikho ijat ajuidiuvem ? Alhang pia kum 2 ho lut inte atiuvin ahi. Kum ni lam chu Naosen Jesu chu ana hollun ahi. Mi hon Pathen ahol tengu leh kum khat ham ahilou leh Lha khat ham ahol pouvin ahi. Amah o hin kum ni ana holun ahi. Ama ho gam'a anopsah nao dalhan Pathen aholun ahi. Amah hina GPS ajui lai jun Judate lengpa pen ding chu akhopiu Jerusalem a pengin te atiuvin ahi. Amah o pilna leh chihna kisong pum'a ahin jui lai jun Jerusalem khopi sunga ahung lut taovin ahi. Hiche a kon'a ipi hung soh doh em ? Herod in gamsunga miching ho akhomin Judate lengpa hoilajia peng ding ham ati leh Bethlehem atiuvin ahi.

Solam ahsi chu amasanguva ache peh in thanom tah in Lengpa pen mu dingin ahung taove. Miching te chun Jesu pen chu aboipi ma

ma jengun ahi. chuleh thilu bom
cheh u aso lhaovin ahi. Tunia ei
hon jong Christa hi naboipi mong
mong khah tah em ? Naboipi khah
a ahileh nang jong phat thei boh
nachan ding ahi.

Miching te chun anei agouvu apeh
goh u hilouvin lampi chom aho uvin
in lam'a akile taove. Lampi chom'a
nache nom leh Jesu nakimupi ding
akullin ahi. Michingte chun Herod
thupeh ho juilouvin vantil thupeh
bangin lam chom lam ajon taove.
Tunia jong Leiset miching te chena
lampi sanga Christa thupha chena
lampia cheding ihiuve. Jesu Christa
thisan in bou ei sop theng ding
ahi.

Thuchaina:

Kipah tah'a kile kit Ahsi lekha them
ho leh kelngoiching ho bangin
ei hon jong Pathen bellin alampia
cheu hite chutile phat boh ichan
diu ahi. Rev Dino L Touthang chu
nupi khat in Chengmai Thailand
a kache e ati chu mi ho kom'a Rev
Dino chu tulajin Chengmai ache e
ati chu Chengmai ase thei lou jeh
in Sekmai a ache e atin ahi. Hichu
Rev Dino in Testimony a keima phat
khat lajin Sekmai lampia kache
in ahin Pathen lungset in tunin
Chengmai a Pathen natong din
kachetai atin ahi. Sekmai lampia
nache khat jong leh tunin Beth-
lehem lampia che tao hite. Asim
jouse Pathen in phat thei boh jing
taohen.



November 30 nikhon, 13 channa Lydia Graduation
lolhing tah a ana kichaitai.

“Emmanuel”

(Pathen in eiumpiuve) - Matthew 1: 23.

~ Rev Tongmang Haokip

Sermon

Emmanuel thuchanga kon na ina kihou lim dingun kahin temuve.

“Emmanuel” kitih thuchanghi achom lam taha seidingin, Pathen in eiumpiuve tina ahi. Matthew 1 : 18 –25. Isiah 9 : 1—9. Pakaijin Themgao kamma anasei nungah nu chu hung gaijin tin chapa khat ahin ding amin Emmanuel asah ding ahi ati, hichu pathen in eiumpiuve tina ahi.

Pathen thilgon :--Pathen in vannoi leiseti homkeova umdinghi achingtup umlouva umding adeipon, mihem panglouvin Pathen in, mihemtehi ama limle melpua einaseuva, ama vahchoi dingle amahou dinga tonsotna nomtah a hinkho mang dinga inasemu ahin, mihem ten ama Pathen inahe tapouvin, ama dounale van douna chonsetna inaumtah jeh un Pathen amatah amisemsate chung a akisihtan, ahi. Genesis 6 : 6. Hitabong chonsetna ilhah laitahun, pathen in avetle asemsa achate Satan in, tonsot damun meidila chenkhom pid- inga setna lamma inapui chu, amasemsa achate ihijehun ave- tle avoujang anan, Gan thisen- nale thildanga lhatdoh thei ihi- tahlou jeh un, Pathen in achapa chang khetset Jesu Chirstachu, iho chonsetna konna lhatdoh dingin, vannoi mihem nangle keilhatdoh dingin vannoi ja ahinsol ding in thulhuhna asem tan ahi.

setna thidinga ium laitah in, Pa- then in achapa chang khatset nangle kei lhat doh dinga, van- noi mihem limle melpua pasal pang louva, mihem melpua, numei sunga, ahung penna ding vannoi mihemte lhenna ahin neitan, ahile, vannoi mi- hem hijat laha Pathen in acha- pa chang khatseh Jesu Cahirsta penna dingin, Mariam ahilhen tan ahi.

Mariam hi pathen in ahin lhenhi, amelhoijeh jong ahi- pon , achihnale athepna jeh jong ahipon, insung loupitah le nomsatah a ahungpen jeh

Pathen in Mariam alhen :--
Vannoi mihem nangle kei chon-

jong ahipon, nungah theng-tah ahijeha pathen in alhen ahi. Chirsta sopi ngaitah, tulaitah hin, Jesu Chirsta pennading kil-heng dinghile, nangjong huh-hingpu Jesu penna dingin, nakilhen nadem? 11 Corinth 7:1. Mitheng Paulin, hungun sopi ngaitahte tasale Lhagao kisuh-boh na a kon in kisu thenguhite ati, pakaija soipte eiho jong tahsale lhagaova ekisuh theng dingun, kahin temuve, ajeh chu pathen chu atheng ahi. Then na hinkho nanei loule pathen in, namanchah dinga nalhen theilou ding ahije, ajeh chu eihonjong insunguva thil keohohi, emanding phatle esuthenguvin emangjive, pathen in, nangle keijong eiman nom ahije, hijeh chu pathen in, manchah dinga deilhen ehina thei dingin, thena hin kho mang ding pakai min kahin teme.

“Emmanuel” Pathen in eiumpiuve :--- “Emmanuel” Pathen in eiumpiuve, ti thuchanghi ngainom umtah ahi. Exodus 13:17-22. Pathen in Isrealte chu gamthip gamma kum somli lam ajot laijun, sun tengle meilom in aumpiuvun, jantengle, meikongin analhonpin, hitichun Pathen in Isrealte chu sunle jan in anaumpin hahsatnale boinathei tamtahlah a konin ana huhdo-

huve. Chapang Naosen khat chu anun apheichunga aponlaisele aumpi laisen alung amongin nom asan, lung mong tah in aume. 1 Samuel 16:14—23. Isrealte laha Leng masapen, Saul Lengpa chu Pathen Lhagao vin aumpi laisen, nomasan atha ahatin, pathen ahin suh milphatin, Pathen Lhagao thengin, adalhan, Lhagao gilou khatin aumpi phat in achunga gentheinale hahsatna ahung lhunganpan tan ahi. “Emmanuel” Pathen in eiumpiuve, kitih, lungmon umtahle ngainom umtah ahi. Pakaija sopi ngaitah minu, mipa, nungah, gollhang, eihojong Pakai Lhagao vin eiumpiu hinam? tulaijin Pathen Lhagao thengin, umpi theilou mihem tamtah aume, Saul Lengpa banga lung thim kiletsahnale, Pathen phat thei boh ichenna-ho sumila, pathen donse talou, hochu Pathen lhagao theng in aumpi theipoi.

Insung 2 Samuel 7:1—19 sung Leng David in Pathen thingkong akhohsa a Pathen thingkong toh aum khom phatin pathenin, Insung chu Pucca building sangin ahoijetai, chule aleng gamjong akhang tou touvin ahi. Insung chu Pathen Lhagaovin, aumpitengle, lungmon nale chamna chule kipanana alodi-

min, Pathen Lhagao thengin, adalhah phat vangle, lunggim-nale lungdonnan, ahinlopan jitai, hijeh chun pakaija sopi ngaitah Pathen Lhagao thengin eiumpi theina dingin, pakaija kipethenguhite, tia pakai min na temna kahin neije, tuchung Chirstmas hi nang dinga itilam dola naman dingham? Pathen Lhagao theng toh naman khom ding ham? ahiloule Satan lhagao toh naman khom ding ham? mihem khat chu lhagao khat in aumpi tei tei ahi, hichu Pathen Lhagao ham? ahiloule satan lhagao ham khat in aumpi ahiloule akivoppi ahi, hijeh chu eima cheh in, Pathen

Lhagaotherg ekilhen ding ham? satan lhagao umpiding ekilhen ding ham? eimacheh in kilhen dingin kahin teumuve.

Tuchung Chirstmas hi "Emmanuel" Pathen in eiumpiuve, ki tihi nanga dinga jong pathen Lhagao thengin, naumpi henlang na Insung jong Leng David Insungle, alenggam khang toujing bangun, na Insungle natoh-na lam lam jong khang toujing henlang, chule chamnale lung monna Pathen Lhagao thengin naumpi jing taohen. Pathen in asim jouse phatthei boh soh kei taken.

KIPA THUPHON

Tukum Lockdown unhen lang boina tampi um jong leh Pathen in KBC Mission natoh na ho vang aboh in ahi. Tuni Nisim 28th November 2020 nikho hin Elijah Prayer Mountain Gothol Mun'a KBC Centre Church New Lambulane Houbung miten Taona in (Prayer Cabin) hoitah khat Rs. 5.30 lakhs vallin ahin sadoh uvin ahi. Hiche Prayer Cabin hi kilom tah in Houbung mite chuleh sah le lhang tohkhompi Pastor ho leh Houbung lamkai ho jaona in Pastor Seitinmang Church Pastor in Thensona aneitan chuleh Prayer Cabin KBC a peh dohna ahin nei taovin ahi. KBC Centre Church New Lambulane Houbung miten Pathen in phat thei boh jing tao hen.

-Rev. Lamkeng Lhouvum.

Christmas iti naman ding ham?

(Road to Bethlehem)

(Bible Luke 2:1-15)

Rev. T. Thangkhosei Haokip

Sermon

Tukum 2020 hi Covid-19 jeh in mun phabep a Christmas leh New-Year man ding leh manlou thua lungboi tampi um ding in katahsan in ahi. Hijong leh phat le nikho che dung juija hung lhung tei ahitai. Nikho vang hung hung lhung tei ding ahi, insung mi kim talou jong aumtan, lang khat a phat chom cha sung a jong mi khat le ni beh in eida lhah mai thei na lai ding u ahi. Damset jeh a hinsot ding ahipon, veiset jeh a hinchom ding jong ahideh poi. Ipi chu hileh ahing galkai cheng dinga Christmas chu mankhom ding hihen changval a man ding hijong leh phat le nikho che dungjuija kigot phot ding chu ahi jeng e. Hijeh chu Houbung mijousen vannoija Christmas kiman dan leh anop na thei ding a lam chom a kigot tampi aum in ahi. Hiche ho chu keima hetchan leh hetdan dungjuija achom lam tah in kahin sei nom in ahi.

1. Christmas Star : Hiche hi Bethlehem Ahsi vetsahna ahin, Bible dungjuija chu amahin Leng thum ahilou leh Solam miching ho chu Naosen Jesu kom a ahin puilut u ahi. Hiche Ahsi hin phat masa lai peh a themgao hon mi-hem te dinga kinep na vah hung lhun ding ana mu masat u chu ahi. Ahileh tulaijin jong hiche imang jing nalaijun kipa aum e. Hinlah tunia kasei nom chu ahileh hiche Ahsi(Star) ikitah jeh uva chu Jesu chu eiho in sunga

hung pengjou ding hinam ti hi kidoh na khat chu ahi. Star let le neo chu ima ahipon, alim vetsah na leh Christmas jephoi na ding kibol ahin, kipa umtah ahi. Amavang Christmas Star chu na in a nakitah tah a ahileh Jesu jong chu eiho insung a chu pengthei ding a kigot na leh kipeh lhah na nei ngai kasan ahi. Mi abang khat chun jule sa thoa Christmas mang jong thou ahi. Pathen thusi khat in ase na a 'Houbung khat in Christmas nop asa val un Pakai Jesu penlam ahépouvé'

ana ti. Tunia jong Christmas hi Pakai Jesu penni ahi tihi geldoh jing ngai kasa lheh e.

2. Christmas Tree : Hiche hi atah leh akijem hoitho thingphung kiphut ho chu ahi. Thingphung atahtah mang jong aum in ahi. Abang in semthu amang in ahi. Hiche chon na hi Europe sahlam a hung kipan ahi. Amahon(pagan) Phalbi golnop man na ding akum ja sang masang a ana man peh u chu ahi. Amaho chun khokhal hung lhunding gal dot na dinga kimang ahi. Christian ten vang tonsot hinkhoa Pathen toh umkhom na lim a kimang ahi. Achuti leh eihon jong Christmas tree ahing hihen lang semthu hijong leh a-en sel bang a chu eiho jong Pathen a ding a hingsdel ihu hinam ahilou leh agosa semthu ho banga chu Lhagao bei hinkho man pum a Christmas iman uham kikhol ngai kasa lheh jeng e.

3. Santa Claus : Amahi Christmas Pa tin jong akihen, ahimong in ama hi amin Saint Nicholas, Saint Nick, Kris Kringle ahilou leh bailam in Santa tin akihen, amahi Lhumlam Christiante chon na khat a Christmas masang jan ahilou leh Christmas lai leh chapang ho ding a nehthei

hin hom ji chu ahi. Santa Claus chun chapang ho kipana ding a nehthei ana hop ahin, ahileh tunia nang le keijin Christmas a dinga kipana thei ipi midang dinga ibol doh tah uvem? Chugoh hilouva gelkhoh ding a kagel chu ahileh mi akhangtou gam a chu Christmas hi bailam tah a bol jong aum in ahi. Hichea het ding khat chu ahileh mi an-eijou jep hon Houbung sunga alhasam a mangnom/jou lou ho ding chun share ato tha jiuvin ahileh mijousen Christmas chu amangkhom ji taove. Langkhat a ipi tikit tam itileh Houbung phabep a Houbung mi chu michom a umhen lang hijong leh Christmas sum chu apehtei ding ti jong aum kit in ahi. Hitobang lah a chu Christmas chu kipana hitalouva kigapna tobang ahitai. Hitobang dinmun a hin Santa Claus natoh chu pat angaitai.

4. Christmas feast : Christmas lai leh nekhkhom hi thupi tah in akigel jing in ahi. Nehkhom aum lou leh Christmas chu ima hilou a gel jong aum thou kit in ahi. Chunga themkhat kahin seitan, Christmas lai ja nekhkhom hi kipa na jal a nekhkhom na a man ding chu kadei sah ahi. Thinglhang Houbung phabep nehding atam chan a nikho jong kiman tamna jong um ahi. Keima neo-

laijin kumkhat Christmas kaman naova bongpi lentah khat kakitha uvin ahileh Christmas sung in kane joupouvin, hiche neh-chai na ding in Christmas leh New-Year kaloikop taovin, kahin kho a ding a Christmas kaman sot na pen ahitai. Aphaí, nehkhom chu kipana dinga ilah leh thil phatah ahin, langkhat a isei leh share tohjou lou hon Christmas nehkhom na a pang jilou aum in, vang set um tah a kagel ahi. Hichea kasei nom chu ahileh neilou ngalou pum a hahsa tah a nehkhom bol sanga ijo kham2 a Christmas man chu phajo ding ham tihi kalung got ahi.

5. Christmas Sports : Christmas lai leh kichep golseh hi thupi tah a gel a ngahlel l'heh jong aum kit in ahi. Hoilai hi jong leh kichep golnop hi angai chat dungjuja bol ding chu ahin, boltei ding vang tia hahsa pum2 a vang bollou ding in kadeijin ahi. Kumkhat kakho uva Christmas lai jin Football a Haosa te leh kho chaga te kichep ding katiuva ahileh alang2 lunggel chu hoibeh lou hidan ahitai. Kichep masang in Ground pam a Khoili te nupa ahung kidel hon tan ahileh tehse cheng in kichep ding chu aphaí tapouvin ahi. Dongman in upa leh gollhang tin kakichem taove. Hichea kasei

nom chu ahileh Christmas lai ja kichep chu kha ding mong tina hilouvin kisuh halna dinga man ding ahin, kinah na dinga man lou ding kati ahi.

6. Christmas Lenkhom : Hiche jong hi phat dang in Hou in leh Maicham mun a la sakha behseh hih jong leh lenkhom teng leh lhimleu jong um thou kit ahi. Malai khang chun lenkhom sot jeh in boina anasoh jing in ahi. Tulai jeng in jong umna lai ding in katahsan nalaije. Hou-in a lasa nom louva lenkhom nop saho hi Pathen avahchoi hilouvin Khang avahchoi joh hiding in katahsan in ahi. Jan lenkhom sot ding de-ihó hi thilpha gel vang hi ding in katahsan deh poi. Thil hi aphaí2 cha man hi khantou na ahin, aval kiti hi apha behseh vang hita lou ahi.

7. Christmas Von : Masang kaneo lai chun Christmas teng leh von thah eikichoh peh lou leh Christmas manglou ding tina ahi jeng e. Vonthah hi kipana vetsah na a jong lah thei ahi. Hinlah kasei nom chu ahileh iham tia insung hahsat jeh a vonthah ichoh jou lou ding a ahileh nulepan chate phatah a seipeh ngai kasa e. Langkhat a kho/Houbung sung a koitobang von l'ha'sam jeh a Christmas

mangjou/nom lou ding aum khah tah leh Houbung lamkai hon panpi na thei lampi hol a pha ham ti jong kalung dei chu ahi. Prov. 31:10ff sunga kisei banga minu lolhing ho dinga vang hitobang vang um lou maithei ahi.

Chung a cheng tilou aphot leh amun dungjuia thil tampi jong um nalai ding in katahsan in ahi. A-ipi chu hileh Christmas chu anop na thei leh ijo kham a man ding katup ahi. Min hitin abol nai tia khonung chan a seichah ding vang bol lou ding in kadeije. Kichep, lenkhom adang² ho hi amun a mangkhom hon ajo jou bep a man khom na ding a lamkai hon gelkhoh a chuleh mipin jong lamkai ho thilgon hi jo chan a nit/jui ding hi Christmas kiman na ding a aphapen hi ding ham tia houlim na chomcha leh moltah hi kahin nei ahi.

199 MBC EXECUTIVE COUNCIL cum 40TH ANNUAL ASSEMBLY



Manipur Baptist Convention 199th Executive Council le 40th Annual Assembly chu MBC Center Church Imphal mun'ah lolhing tah in ana kichai tai. Hiche kin gon lentah hi KBC in mopohna alah ahin Convention thalheng'a Centre Church New Lambulane in toh le tham ijakai mopohna alah ahi. Hiche pan gala jouse, ahideh'a President, Former President le Secretary jouse le Centre Church New Lambulane houbung mite chung'ah kipa thu sangtah in ahung ki phong in ahi.

-Rev. Thongkholun Touthang, Finance Secretary

PUM KHAT DINGA LHATDOH IHIUVE

Exod. 5:1; Gal. 5:1, 13-25; Jn.17:11

Rev. Dr. M. Thongkhosei Haokip

ARTICLE

Thumakai:

Tukum hi vannoi pumpia Covid-19 hung lhun phung jeh hin thil jouse ahina ding le gelbang ahithe i tapon ahi. March 25 nia pat in Manipur chule India pumpi le vannoiya lock down umtoh kilhonin lhangpi nun le changvalla hinkho kimanchahna atongkha lleh jengin, mi tampi dingin gentheina, thina, kana aso in ahi. Hitobang gimneitah dinmunah ihoubungu le gambih chule Convention cheham ham theiya ium jallun kipa aume. Pathen thangvah leh vahchoiyin um taken. Ahin, madanga sanga sum le pai holna le muna alhahsam hin houbung ahideh a KBC dinmun jong atong kha lleh e ajeh chu eima-eima ding bou kigelna le kikhohsahna ahung pung lleh tan ahi.

Hiche toh kilhonna Kipumkhatna thudol sermon/article khat hi tukum thah toh kilhonna iki hetsah thahnomun ahi. Mun jouse le mi jouse kipumkhat tah a achenkhom dingui Pathen lungdei ahi. Kipumkhatna kiti hi vannoi leiset in angaichat pen loikhat chu ahi. Ahin mun jouse kibung khenna, loitum semna, kipum khat louna lunggel le natoh, lungngaituo, thuseina hojeh in boina tampi ikiloi den un ahi. Ikipum khat u angaiye. John 17:11,21 na ah, iPakaiyu Jesu Christa chun ama nungjuiho (eiho dinga jong) ataona chu: "Ka-pa theng, eini pumkhat ihi

banga amaho jong pumkhat ahitheina dingun ..." ati.

Chule solchah Paul in, 'Lhaova pumkhat hina dingin kihabol un kihabol un' atie. Hijeh a chu Houbung ahung umlona khat chu ahile mijouse lhagao, lungthima, tahsa a, imalam jousea Christian hinkho a pumpia kipumkhat sahna dinga kithopi ding chu ahi. John lekhabu chun kipumkhatna aumlou akhodan iPakaiyu Christa'n leiset adalhad masanga ataona a kon chun imu uvin ahi. Solchah Paul in Epheisia mite henga kipumkhat lou akhodan aseie. Kipumkhat kiti chu ipi ham? Ichan geiya ikip-

umkhat tah uvem ti ikihet thei-yu ham?

Kipumkhatna hilou ho

Kipumkhatna het theina dingin itobang ho chu kipumkhatna hilou ham ti ana ve masaute.

Khatna, Kipumkhatna hi tahsa mihem semthu kiloikhomna ho kipunkhomna (organizational unity) chu ahipoi. Christian Organisation ho phudoh jong ahipoi.

Nina ah, Kipumkhat na kitihi mihem jouse kibahna (uniformity) ahi-deh poi. Miho lunggel le natoh jouse kibang jou kei ding kiti hi ahi-thei lou thil khat chu ahi. Eg. Hindutva's policy on one nation one language

Athumna ah, Kipumkhatna kitihi thuhil (doctrine) chungchanga mi jouse kito chet ding tina jong ahideh kit poi. Sapaova 'we agree to disagree' atiu banga midang lunggel achom ahina hetpeh le sanpeh chu ahi. 'In essential unity, in non-essential, in non-essential liberty, in all things charity'.

Achuti le Kipumkhatna chu ipi hitantem?

Khatna, kipumkhatna hi Pathen a kon chule Ama alailunga umna chu ahi. Pa le Chapa khat ahina kipumkhatna chu ahi. Hiche jeh a chu Pathen le mihem kah jen-

gseh hilouva mihem le mihem kah jenga jong kipumkhat theina chu ahi.

Nina ah, Kipumkhatna kitihi lunggel kibah louna lah a kihet themna jalla pumkhatna (unity in diversity) ahi. Solchah Paul in, thilpeh jat chom chom (different gifts) aseiyin, khat le khat kipomtona chu ahi. Insung khat a minu, mipa, chule achateho jong thisan chedola a kibanglou ahivanga insung khat ahi tobang ahi.

Thumna, thuhil (doctrine) alhangpia kipompeh tona chu ahi. Thuhil abonin hetna kibang hih jong le kijatona le kingaikham tona ahi. Masang laiya houbung Pa-te (Church father) holah a khat St. Augustine kitipa thusei: "in essentials unity, in non-essentials liberty, and in all things charity" hi geldoh thei tah khat ahi. Aman aseina hi thuhil jong hi jat thumin ahin khenin, jat khat chu angaicha tahbeh ho – tekahna a huhhingna thudol hi compromise bolthei hilou jeh a chu essential ahi. Ahin adang ho chu ngaicha ahivanga chamlhatna kipehtona angai ahin, thil jousea kingailutna (charity) ngai ahi atie.

Kipum khat dinga chamlhat ihuive

Kipum khat dinga chamlhat ihi-

uve kitihhi KBC thupi jong ahi. Bible ivet uva ahile kipumkhat-na hi Pathena kon hia, kibung khenna/kikhentelna hi Satan a kon ahi ti aseiyé.

Thulhun lui lam ivet le Israel mite Mose lamkaina a chamlhat na ding ngahlal a um ana hiiuve. "Ka mite lhadoh un" (Let my people go) tin Pharaoh lengpa henga ana seiyein, Israel mite hi soh namkol jona kona lhadoh na dingin ana ngeh jing toh kilhonin lhadoh anahiiuve.

Tulaiyin "chamlhat" kiti thucheng hi akihe khelin akigelle. I gam le inam sung uva hiche chamlhatna hi 'keima dei deiya kabol thei' tihin mi tampin agel tan ahi. I society le houbungho jong kibung khenna jat chom chom niseh a pungjing ta, eiho hou kiloikhomna KBC jeng jong houbung hon apu hina neinom talouva ama ama deideiya kivaihomna neita!

Tekahna a KBC Danpia ineiyu houbung le Convention chu aninia adinjou theine dinga 50:50 hopsom le maicham ho kihom ding kitihhi houbung lamkai hon amaho assembly a apohdoh uva, KBC a tukum ijat ithah diu ham tia kihouna le kilolna aneitheiyu hi tijat umtah kibung khenna hilou ham? Hitobang

lunggel hin abol ho chung a so-hchanna asodoh in, chule Convention ministry bolna a thalhomna asodoh in ahi.

Chamlhatna hi lhangpi nun (political) lamtoh kisaiya ahinkho phal ngam minu le mipa ho kipeh theng (sacrifice) jalla kimu; chondan-khandan toh kisaiya numei-pasala kikhenna, jat le nama kikhenna, ateh le akhang kah a kikhenna, mihem tahsa kijohna jeh a sohchanna a kona kilha-ongna; tahsa chung a soh joar kap, judon-sakham, neh-le-chah kitup lou, numei chung a sohet, chule adang dang a chamlhatna ngaicha ihiiuve.

Jesu'n jong chamlhatna thudol eina hil uve. John sut kipana thupha sungah chun "Nangho kathua naum uva ahile kaseijui tahbeh nahi dingu, thutah chu heuvin natin thutah chun nachamlhat sah dingu ahi" ati. Solchah Paul in Galatia mite henga anajihna ah, "Soh ihilou nading uva Christa'n eilhatdoh u ahitai... Soh namkol jona chun kihen oh kit hih-un" (Gal.5:1)". Paul in Christa a chamlhat ahung um ding dan aseiyé. Aman ahilchen na ah, "Nangho soh hilou ongthol dinga kikou nahi- uve; amavang soh nahilou nau naongthol nau chu tahsa lama dingin agomkomin neidauvin,

ahin ngailutna in khat le khat kijen touvin" (v.13) ati.

Hiche chamlhatna hi changa eima deideiya hin ding hilouva jalhang (community) a hinkhomna le kipumkhat tah a hinkhomna aseina joh ahi. Kipumkhat nahi ngailutna a kona hung umdoh thei ahin, hiche ngailut na chun insung le louma chule imihem chankhom piho chungang mopohna hetna chu ahi. Tulaiyin imophnau chu thilsem dang chungang jong ihetbe tauve.

Akhumkhana

Achainan, mun jouse le mi jouse kipumkhat tah a achenkhom dingui Pathen lungdei ahi.. Kipumkhatna hilou ho chu, khatna, tahsa mihem semthu kiloikhomna ho kipunkhomna (organizational unity) chu ahipoi. Nina, mi jouse kibahsah na (uniformity) ahideh poi. Chule athumna ah, thuhil (doctrine) chungchanga mi jouse kito chet ding tina jong ahideh kit poi. Kipumkhatna hi Pathen a kon chule Ama alailunga umna chu ahi. Pa le Chapa khat ahibanga mihemho jong ahidingu adei ahi. Nina ah, Kipumkhatna kitihi lunggel kibanglou hijong le kihet themna jalla pumkhatna (unity in diversity) ahi. Thumna,

thuhil (doctrine) alhangpia abonin hetna kibang hih jong le kijatona le kingaikham tona ahi.

Kipumkhatna apoimo je dan chu, Christa hiche ding jeh a thi ahi. Chule, vannoi miten atahsan theina dinguva poimo tah khat chu ahi. Solchah Paul khanga Juda mite le gentile te kibung khenna le nam kidou teni cross a agopkhom a houbung khat aso ahi. Chukitle, thahatna le kivenbitna dinga poimo tah chu ahi. Kumthah ahitoh kilhonin, changval hihen kiloikhomna hijongleh pankhoma, houbung leh gamsung semphatna dingin pan lacheh ute. Hichena dingin houbung hon Office a ahina ding banga pehding-thahding ho phatah a peh ding hi kumthah manlo khat hiding ahi.

Kipumkhatna dinga Christa'n eikouvu ahin, thempu ahina a pumkhat ihitheina dinguva taona eimanpeh nau le solchah Paul in iPakaiyu Jesu Christa minna pumkhat hina dia ana sut chu eima changval, insung chule houbung sunga bulhitsah dingin kigo cheh u hite. Lungluttah a sim le ngaiho jouse Pathenin phatthei boh tauhen.

JOT KHAH LOU LAMPI

(Joshua 3:4)

Ms Lhingboi Kipgen

ARTICLE

Chena khah lou ahilou leh jot khah lou lam pi a hi iche di teng leh ipi kitoh kha ding ham ti jong akigel in kichatna leh tijat na aki nei jin ahi. Chujong leh itobang vetnom um kamu dem ahilou leh thilpha ipi kato khah ding ham tin thanop na leh kilop na jong akinei jin ahi. Hiti chun chena khah lou lampi ijot teng leh kichatna leh lungkham na, thanop na leh kinep na pum in akikal song jin ahi. Hitobang chun kumthah 2021 igal dot jing lai jun ilung uva thil tampi igel diu katahsanne. 2020 kum hi inung vet leh Covid-19 jeh a genthei hahsatna tampi ito hou igel leh che mang loi jeng hen tia ngah lel jong ium diu katahsanne. Ahin 2021 jong itobang kum hiding ham ti koi man akisei theipoi, ajeh chu mukhah lou hetkhah lou man khah lou phat hina lai ahijeh in imacha seithei ahapon ahi. Ahin mi tamtah kinep na vang hi kumthah leh vang hito bang natna leh boi na ho jouse hi pha dom in tin lung mong in angai na hinkho kimang thei kit tan te iti maithei u ahi. Hijong leh mi loikhat in vang seithei ahipoi hung khoh cheh maithei ahi, hijeh chun tohgon lentah jong nei lou va aphot leh ahui nun vet a nga di ahimai je ti jong kium da kit lou ahi. Hitichun ahung lhung ding kumthah 2021 igaldot jing utoh kilhon in ilung uva kichatna leh lung opkaina, kinepna leh thanopna pum a ium thei ju ahi. Imacha kisei masa

thei lou hetmasat jong um thei lou inga jing lai jun iti ikimaito pi diu ham ti Pathen thua kon in chomcha anakitilkhon uhite.

Pakai Pathen in alhacha Mose chu ami Isreal te Egypt gam a kon a pui doh ding in ana kou vin ahi. Hichun Mosen jong Israel nam mite chu Egypt gam

a kon in ahin pui jin kum 40 jen lut in ahin pui jin ahin gam tep gam Canaan gam alhun masang in Mose ana thi tan ahi. Hichun Mose khel dingin Pakai Pathen in Nun chapa Joshua Mose jen na ana pang pa chu akou tan ahi. Hiti chun Joshua lam kai na in Israel miten lei Canaan lut dingin kigot na anei tao vin ahi.

Hichun Joshua leh atohkhom pi ho chun mipi kom a chun Jordan galkai ja Canaan gam lut ding ihitao vin, alampi hi nahokhah lou lai ju lampi ahijeh in najotna diu nahet thei na ding un Pathen thingkong vejing un lang anung jui jun tin ana hilchah un ahi. Chuleh Joshuan Pathen thempu ho kom a chun mipi ten kicheh tah a amuthei na diu vin Pathen thingkong chu sang tah a adop diu vin thupeh anei jin ahi. Israel mipi te chu Egypt gam a kon a Mose lamkai na noi ja ahung kitol sung u chun jan leh meikou chuleh sun leh meilom in Pathen in gammang noi ja ahin pui peh in ahi ti iheuve. Tun gamtep gam Canaan gam alut ding u hin Pathen thingkong kipui sah ding in Pathen in alhacha Joshua mang chan amite chu gamtep gam khoiju leh bong noi lon na gam ana pui lutne ti iheuve.

I sei sa bang un Pakai kum 2021 sunga hi ipi ito diu ham hetmasat thei khat cha aum pon ahi. Lamsuh lamtou kijot thei, ling leh khao lah jong kijot pa thei, huipi gopi, chimpei jat chom chom jong kikimaito pi thei ahilou leh ham hing dum lah lah jong kijot pa thei ahi. Jot khah lou lampi ahijeh chun ipi um ding ham ti koima chan ihe

pouve. Hijeh chun kichatna, tijatna, lungopkaina, chuleh thanop naleh kinep na jong aum in ahi. Pathen tahsan chate dia lung mon um tah leh kinep um tah chu Pathen in eiho kelngoi chin a eichinuva ama kho nung iju jing uleh igam man nadiu um pon tin, kichat ding jong um pon tin, kinep lel na ding leh lung kham na ding jong um ponte ti ahi. Aman ham hing dum lah lah a kelngoi kol a eikol sah thei ahi ti tahsan ute (Ps 23). Genesis 5:22-23 chu isim leh Enoch kiti pa chu kum 300 sung in Pathen toh kilha kang lou vin anakilhon in kum 365 ahing in Pathen in ana kipui tai ti imu vin ahi.

Sopite ho jot khah louna lampi tobang kumthah 2021 lem dinga ikigot jing lai jun achesa kum 2020 nung vet u tin Pathen thangvah na dinga lom inei hou jong geldoh u tin sukhelna ho ngaidam kithum uhitin, ilhin lel na hou kithah sem uhite. Kumthah sunga hi Isreal ten lei canaan lhun na ding leh lutna dinga Pathen thingkong avet geh uva aju jing bang un eihon jong Pathen thupeh nit na, athutheng sim na lam a kihabol cheh na inei juva isim seh seh hilou va ihin kho a neija jui ding in kigou hite. Kipa um tah

in 2020 Lockdown kum hi Bible sim na ahilou leh jih tho a Bible pumpi ijat vei ham simchai chuleh jih chai jong mi phabeppi aum e tijong akijan ahileh kipa aum lleh jeng in ahi. 2021 kum jong hi itobang phat in eiphah diu ham ti hetthei ahapon, loikhat in aseih leh Covid 19 natna hin vannoi leiset gam chom chom a 2nd wave tichu anivei na in ahung kitol kittai ti thu ho jong akijan ahi. Ahilou jong leh Covid-19 natna sanga khoh jo kichat tijat um thil chom chom

jong ito thei ahi. I khonung ding u imacha imupha pouvin ihetphah u jong aum pon ahi. Hiejeh chun ijakai hesoh musoh a imajouse athu noiya koi jing Pathen toh ikilhon khom jing pou leh lung olmo na ding aumpoi. Na lampi Pakai jenga lhung lut in ama jeng tahsan in aman nabolpeh nante (Psalms 37:5). Nacheekhah louna lampi a chun ijakai hesohpa chu nahinkho a kou lut in lang Ama tang louvin kipuisah jing tan. *Asim jouse Pathen in phatthei boh taken!*

NEW KEITHELMANBI HOU-INN THAH THENSO HITA



Tuni nisim 27th November 2020 (Friday) nikhon New Keithelmanbi Baptist Hou-Inn chu Pr. Letkhoson Haokip, Pastor Gambih No.7 in Apa Pathen, Chapa Pathen chuleh Lhagao Theng Pathen min'in hondoh na aneitan ahi. Tuchung Hou-Inn thensona kin ahin Rev. Lamkeng Lhouvum M&E Secretay KBC (I) chu speaker in apang in ahi. Hetthei khat chu hiche New Keithelmanbi Hou-Inn hi 2011 kuma ana kisa pan ahi.

-Pastor Th. Letkhoson Haokip

LUNGTHAH KENG UN LANG

LIM CHOM PU UVIN

(Rome 12:2)

Rev. Lunkhosei Tuboi

ARTICLE

Lungthah kengun lang lim chom pouvin kiti hi ipi pen kisei na ham, itabang chu lungthah hi a itabang chu limchom hi a ham? athah akiti teng alui khat ana um ti na ahi alui kiti hi koiman jong adei jou talou thil lui ho chu ahi, thillui ho hi lungset nakhat le gelkhoh na khat akinei vang in aman na ding aum jitapon chule ilungthim ma gelphah na behset aumjipon ahi.

Hiche laija lungthah keng ding a ei kisei peh u thucheng hi Pathen min na ana kikhel Jesu Christa thisan na kisutheng a Pathen to kihou mat na inei nao lungput lungthim ho chu ase i na ahi.

Pathen to kihoumat na neithe i lou lungput ho chu Eden na chonset najeh a Pathen in ana paimangsa lungput pa chu ahin hichu Chonset lungput/lungthim chu kisei na ahin Pathen to kihou thei talou lungput chu ahitai.

IPI TI LUNGTHAH CHU IKAN DIU HAM

1. Pathen lungdei lam a hink-ho man ding:

Pathen lungdei chu itabong chu ham, Bible in ipi aseiyam?

Verse 2a "Nang ho tulai vanoi leiset chonhin hin chonhih un" tin akisun in ahi, Vannoi chon na chu itabang ham, (Rome 5:

19-21). Hicheng se lungput ho le ichon nao hohi ikisih piuva Christa thuhil la kon ijah ui ngailut nathudol la ikikou nao dungjui tah a hi ichon diu hi Pathen lungdei pi pen tah chu ahitan ahi.

2. Apha lah thei a thusei na/ chon na nei ding

Bible ivet na ahile "Pathen lung-

set vanghin nati pumpiu chu longlhen thengtah gan kih-inglhaa bangin Pathen lah thei doltah-in Pathen nah kipeuvin" tin akisun kit in ahi.

Pathen lah thei dol tah a apha lah thei dia hinkho chon naho hi iman dia va Pathen in eihil nao hi Calvary'a achapa Jesu Christa'n thina chan gei ahungthoh a setna thule ama themkichan na thu chang khat jong seidoh louva eiho ngailut najalla thina chan ahungthoh hi eiho jouse vetjui thei dia ahung thoh ahi tai ti chu iheu vin ahi.

Hiti jeh a chu tunia i-leilam chon nao le hinkho man ho hi idalhah uva Pakai jin eikouna lamdol tah a chu ichonset nao jouse ilunghei piva Pathen milungset na vang a chu lungthah iken diu chu Pathen lung dei lam ahi.

3. LIM-CHOM PU-VIN

Limchom kiti hi thildang ahi-deh pon Eden chonset na mel la ikivon nao lim pa chu asei na ahi. Hiche chonset na lim put chu ahile

1. Kiletsah na
2. Engset na
3. Jousei na
4. Sele pha hetkhen na

5. Ei le ei them kichan na
6. Toltha na
7. Huh le jonthan hoina
8. Ju le sa neh na

Chule adang dang set na kiti jouse chu Eden chonset na limput chu ahin, hichu vannoi limle mel lin jong akisei jin, hiche lim le melput na kibol doh jouse chu apha khat cha jong aumpon, Bible in jong hitin asei jin ahi "Chonphat lou najouse chu chonset ahi" atin ahi. (1 John 5:17)

Hiche limle melput chun Pathen kom ma eipui lut thei lou diu phat na chu Pakai Jesu Christa natoh na lim le mel put na chu limchom pu dia kouna sang tah ichan u ahi.

Chapang thuseiyin kisei tadile, Vangam nalut nom le Chonset limput chu pailhan lang Christa thisan na kisutheng a chonphat na limput chu pun tina ahitai.

Hiche Christa jalla limle mel put nei ja chonphat nalam ma chon ho chu LHAGAO va hing tin akihen ahi.

4. LHAGAO VA HING HO CHU LIMPUT CHOM ANEI YUN AHI

Lhagao va hinna nei mi kiti hi ivetteng jong le hetthei nakhat

chu kicheh tah in akimu thei-jin ahi Ama ho chun “ima jouse ah thoh hat na anei jun ihesoh genthei nau jenga jong kipah jinga um ahiuve, hesohna chun thoh hat aso sahjin, thohat chun photchen na sosah jin, photchen nachun kinepna sosah jin ahi ti ihuve, chule kinep nachun ei-jumso pouve. Ajeh chu eipeh u Lhagao Theng vanga chu ilung sunguva Pathen ngailut na long lut ji ahi” Chuti ahin tahsan vang a Pathen toh kichamdela um ihitauve chujongle ama vang a chu hiche lungset na idin det nauva hi tahsan vanga lut ihi-tauve. tin Bible lin eisei peh un ahi

Ama ho hetdoh thei napen tah chu achonnao kikhellin, ahinkho man u akkhellin thilpha bol na lamah chimtih aneipouvin, napha toh na lam mah agunchu uvin, phunchellou hellin atoh nalam jouseu vah kinem in aumjing un ahi. Ajeh chu Pathen gam chon na chu atuh chah un aumjing bouvin ahi, Ajeh chu Christa le Pathen gam sunga chu mijonpan, mi thenglou, mipapse, milim hou adang dang hojong chu ima achan ding u van nah aneipouve ti aheu vin ahi.

Hijeh chun eiho lhagao va hing ihu le lhagaovin chonuhite, khat in khat lungghansah in chule khat in khat kithangset ton pan nabei yin hoitho pouhite ti hi Pathen lekha bun eihil nathugil tah chu ahi.

Lhagao lam ma hin na nei mic-hun min ahil masang in lhagao va achon nadi dol akihet in lhagao va ahat na ding dol akihet in, chule lhagao damthei nading le hat doh na ding akihet cheh in ahi.

Aneh jong le adon jong le chule akiman chah najouse thudollin jong vandou le mihem te dou-nan nan jong hinkho amang jipon ahi.

Hiti ahijeh chun sopite tunin kigel uhite, ipi ti hinkho naman na lungput lunggel naneijam chule ipi lim le mel la chu nakivon na naumham ti hi tunin kithah gelphat kit uhitin, adih lou ana hikhah tah jong le tunia hi lungthah keng a lim le mel chom Christa jalla anei cheh iken cheh na diu vin nabon chao-ovin Jesu min in kahin tem un ahi

Pathen in nabon chao chung ah phatthei na naboh taohen

Mission Column

*Rev. Lamkeng Lhouvum
Secretary Mission*

Christa Thisana lhat na lhadam kachan khompi Houbung mite leh hiche KBC Thuso sim jouse Pakai Jesu Christa minin KBC Mission Office a konin kangai lutnao salam kahin pen ahi.

1. Elijah Prayer Mountain Main Sanctuary Foundation kilai-panta.

Nisim 30th October 2020 nikho hin Elijah Prayer Mountain mun'a Main Sanctuary sah na ding mun Foundation leiset JCB a akilai-pantan ahi. Hiche nikho hin Mission Board hon hong gunchu tah in pan akilan ahi. Pathen lungset in natoh amachal lhejh jengin ahi. Chuleh Nisim 10th October nikho chun Pillar Foundation ho sat (Mixture Machine) akimangin Sat sun na akinei tan ahi.

2. Chavangkut nikho Houbung vilna:

1st November Kuku Chin Mizo ho dia suhmil thei hilou nikho loupe tah khat chu ahi. Tukum hin Sunday nikho toh akito jeh in keima jong KBC Centre Church Kangpokpi mun'a kiman chah na akineijin ahi.

3. Missionaries ho leh Evangelist ho taokhomna:

Nisim 11th November nikho hin Missionary ho leh Evangelist nikho ahitoh kilhonin lunglut tah in KBC Office mun'a Taokhomna akin-eijin ahi. Miss Lhingboi Kipgen Secretary Women Department Pa-then thu a tilkhouna sangtah anaijin ahi.

4. Kipa thuphon

KBC Gambih No. 8 Achesa 10th November nikho chun Elijah Taona mol'a Bible chang " Imacha lungkhamna neihihellun, Ahin ima lam jousea Taona le thumna toh thon na thum jouse chu Pathen hetsah un" (Philippi 4:6) hi Sign Board lent ah EPM Mun'a ahin tah doh thei taovin, KBC Gambih No. 8 chung a kipa thu sangtah in ka-

hin phongin ahi.

5. Chate Camp Lolhing tah a chelha:

Achesa nisim 5-9th November sunga Rev Letminthang @ Mimin leh aloinu Ms Ruby chuleh Team hon, Thingphai Baptist Church KBC No. 14 mun'a Chate camp ana neijun Pathen jallin lolhing tah in ahung kimang chaovin Pathen thang vah in um hen.

5.Mission Field thah hon ding tohgon:

KBC Mission natoh hi isopiu Meitei ho lah'a Mionistry hi mistry khatna ineiju ahitan hijeh chun Pathen in pha asah leh 2021 sung'a hi Chanung Area Meitei field thah hon'a pha ham tin lungelna aki-neijin ahi. Hijeh chun S Phailengkot Houbung hot oh kihoutohna na leh kitho khom di lungel ho seikhomna 18th November 2020 chun akineitan ahi.

6. KBC Mission Board Tour:

KBC Mission Board ho achesa 21st -22nd November 2020 sunga KBC Gambih No 20 area Mission Tour akichen ahi. Houbung kivil ho . 1. Bongmol Gambih Centre le & 2. Bongli Baptist Church Pu Thangkholun Haokip Mission Vice Chairman leh Pu Haopu Singsit akimange. 3. Haikot le 4.Jougam Baptist Church a Pu S Athang Haokip le Pu Neka Vaiphei akimangin ahi. 5. Molpi le 6. Samukom Baptist Church a Rev Lamkeng Lhouvum leh Pu S Onkhomang Haokip akimangin ahi.Tour Programme lolhin thei nadin Gambih Pastor Mangboi Kipgen leh Gambigh lamkai hon gunchu tah in eiki thopi jeh un nasa tah in akilolhingin amah o jouse chungu kipa thu kahin phonge. Chuleh Houbung hon jong Pakai min'a lemna einei jeh un kipoa thu sang tah in kahin phonge.

7. Tahsan thah ho Tuilutna kineipeh ta.

Arunachal mission field Bekhuliang Houbung mun'a 6th November nikho chu Pakai tahsan thah ho Pa- Pathen, Chapa Pathen chuleh Lhagaotheng Pathen minin Tuilutna mi 8 Pastor Haolenlal Kipgen khutna aneitaove. Field sunga Evangelist chungu kipa thu

sang tah in akiphongin ahi.

8. Genthei hahsa kithopina .

Arunachal Pradesh Missionary Supervisor Pastor Nabin lamkai na in Mission field sunga genthei vaicha ho kithopina ana chelhan ahi. Missionary ho natoh kipapi aum l'eh jengin ahi. Pathen thangvah in um hen.

9. Elijah Prayer Mountain mun'a Programme chom chom an ache lhan ahi.

a) Nisim 7th November 2020 Monaphai Local Church Youth Department Fasting Prayer achelhan ahi.

b) 15th November Nikho in EOC Compound Veng D Phailen Houbung miten, One day Fasting Prayer aneijun ahi.

c) Kuki Nampi Taona Nisim 21st -23rd November nikhon EPM Mun'a Taona nikho Two days Programme ana ume.

d) Khudengthanbi Baptist Church a konin nisim 23rd nikho chun Pu Ngamjalhun & Family EPM Taona mangin ahungun ahi.

10. Holy Marriage

Koraliang Baptist Church, Arunachal Pradesh a nisim 23rd November nikho chun Holy Marriage Pastor Nabin in ana neipeh in ahi.

11. Evangelist ho Tour Programme:

Pathen lungset In Evangelist ho adeh a a) Gl. Lenkhohao Haokip KBC Gambih No. 17 Chahssad gamkai. B) Gl. Chochon Haokip KBC Gambih No. 12 Chahkap Gamkai achonin ahi. c) Ng. Neoshi, Ng. Sherlyn chuleh Evangelist Pretty Lamneilhing hon jong KBC Gambih No. 16, No. 4 chuleh No. 19 Preaching Tour ache jing lai'ju ahi.

Pathen lungsetna Missionary ho jong atoh nao cheh a machal jing'in Pathen thangvah in um hen. Houbung mite jong gunchu tah'a ipan nao maban na jong gun chu tah in pang jingo hit. Pathen in KBC Houbung Mission natoh nap hat thei boh jing taken, Amen.

KBC HOLISTIC DEVELOPMENT

Coordinator, Holistic Development Committee, KBC

RELIEF:

November 9, 2020 nikho in Development of Human Potential (DHP) te toh kithokhomna akon in KBC Development Committee akon in KBC Imphal sung'a Covid-19 jeh'a gentheina anaha to dehset inbul (Family) 57 ho chu KBC Office mun'ah taopehna le thilpeh neocha cha ana kipedoh in ahi. Thilpeh-ho chu: Anchang - 5Kg, Daal - 1Kg, Chi - 1Kg, Ankam Thao - Litre kekhkhat le Mask - khat cheh ahi.

SEMINAR:

November 26, 2020 nikho in KBC Development Committee le DHP (Development of Human Potential) makaina in KBC Chapel Hall mun'ah Covid- 19 chung chang thua nikho khat kihilna ana um in ahi. Hiche kihilna achun Imphal sung'a Pastor-ho le houbung lam-kaiho jaona in mi 30 in pan analauvin ahi. Kihilna kichai in Relief thil phabep ana kihom doh kit in ahi. Thilpeh-ho chu: Anchang - 5Kg, Daal - 1Kg, Chi - 1Kg, Ankam Thao - Littre kekhkhat cheh ahi.

ORGANIC PRODUCT:

Tahsa damtheina ding'a neh le chah theng lou le ai (Fertilizers and Pesticides) jaona lou angaichan ahi. AbaFarms India toh kitho khomna amachal jing toh Ihon in Organic (lou le ai jaolou) Phing (Ahlu/potato), Changnam (Onion) chule Chache (Tea leaf) Bazaar (Market rate) sang'a lhomjoa mutheija ahung umding ahi tai. Organic anche lou hinghohi Market Rate alhom pen jong Rs. 100 chung lam ahi, hijong le AbaFarms a kona imu diu ahi potato - Rs. 40 per Kg, onion - Rs. 40 per Kg, Chule tea leaf - 800 per Kg ahi (Chache hi mun dang'a KG khat a Rs. 2,000/- val man ahi). Chule AbaFarm Organic Producet hohi Bazaar/ Dukan (Market) dang bang'a alhom pet atam pet um talou'a kumlung keija hiche Rate a hi kichoh jing ding ahi tai. Lou le ai jaona lou tahsa damtheina ding in kichoh cheh ding in ana kigon ding in Houbung miho jouse temna ahung kineiyn ahi.

Office Diary

(November 2020)

November 2: Vangset umtah in Pastor Lalmintang Singson (70), Retd. Pastor KBC in tahsa hinkho eina mollem san tauve. Ama chen-na MB Saichang, KBC No. 11 mun'ah Rev. Pillar Paosei, Gambih Pastor kin thempu hinna in vuilemna ana um in ahi. Office Secretary mi thum chule worker phabep injong ana op uvin ahi. Pathen in adalhah insung mite lungmonna le lhamonna pe jing tauhen.

November 2: KBC Secretary phabep in Pastor Holthang Haokip, Retd. Pastor, KBC achenna MB Saichang mun'a vilna le taopehna ana nei uvin ahi.

November 4: KBC Development Committee tohgonna a Lydia Resource Center, Churachandpur muna Five Month Tailoring Training akichai toh Ihon in Graduation Service akibol peh in ahi.

November 4: KBC Women Department mopohna akon in Lydia Resource Centre, Churachandpur mun ah Relief thil hopdohna ana um in ahi.

November 4: Rev. Dr. M. Thongkhosei Haokip le inneipi 25th Wedding Anniversary, KBC Campus, Imphal mun'a Rev. Tonglet Haokip, kinthempu hinaa KBC Workers le ajiteu toh lolhing tah a ana kimangkhom in ahi.

November 8: KBC Event Calendar dungjuiya Chapangte Nikho ahitoh Ihon in houbung phabep in Chapangte nikho ana mang cheh uvin ahi. Convention hop ding in Mr Paolunlal Kipgen, Child & Evangelism Director in Zoom Service mang cha in thupi seina ana neiyin ahi.

November 9: Development of Human Potential (DHP) te toh kithokhomna akon in KBC Development Committee akon in Imphal sung'a Covid-19 jeh'a gentheina anaha to dehset inbul (Family) 57 ho chu KBC Office mun'ah taopehna le thilpeh neocha cha ana kipedoh in ahi. Thilpeh-ho chu: Anchang - 5Kg, Daal - 1Kg, Chi - 1Kg, Ankam Thao - Littre kehkhath le Mask - khat cheh ahi.

November 14: KBC Ordination Committee chun Pastor Roman Tiwary chu Saijang Baptist Church, KBC No. 3 mun'ah Ordain ana bol tauvin ahi.

November 14: KBC Ordination Committee chun Pastor Hencha Kipgen, Moreh chu Ordain ana bol tauvin ahi.

November 20: Mr. Lamgoulen Khongsai le Ms. Doituailou Haokip chu Centre Church B. Vengnom, KBC Gambih No. 8 mun'ah Rev. Lunjalen Khongsai kin thempu ina in hou dantheng in kikhutsina ana neilhon tai. Convention thalheng in Rev. Pillar Paosei in houlimna ana neiyin ahi.

November 19-20: Manipur Baptist Convention 199th Executive Council le 40th Annual Assembly chu MBC Center Church Imphal mun'ah lolhing tah in ana kichai tai. Hiche kin gon lentah hi KBC in mopohna alah ahin Convention thalheng'a Centre Church New Lambulane in toh le tham ijakai mopohna alah ahi.

November 25: Kuki Baptist Convention Gambih No 3 Kum 25 Ih-inna Silver Jubilee Celebration, Molkon Bazar mun'ah lolhing tah in ana kimang chaitai. Convention lamkai phabep le worker phabep injong kilom tah in aga op uvin ahi.

November 26: KBC Development Committee le DHP (Development of Human Potential) makaina in KBC Chapel Hall mun'ah Covid-19 chung chang thua nikho khat kihilna ana um in ahi.

November 26: Pator David Jangkhogin Chongloi, s/o Pastor Ch. Chunglet chu Deborah Chinneilam Khongsai toh Centre Church Kangpokpi mun'ah Rev. Letpu Kipgen kinthempu hina in janggop in ana um Ihon tai. Hiche kin u Office thalheng in mi thum chule worker phabep in pan ana lauvn ahi.

November 28: KBC Office Secretary phabep in Gambih No. 13 Executive chengse toh Khangbarol mun'ah kimutona le kiviltuna ana nei uvin ahi.

November 29: (L) Pu Jampao Kipgen, B. Vengnom vuilemna kin ah Rev. Thongkholun Touthang le Ms Lhingboi Kipgen in Convention min in pan aga la Ihon in ahi.

GAMBIH LE CENTRE CHURCH THULAHKHOM

(November 2020)

November 1: Molsang Baptist Church, KBC Gambih No. 18 mun'ah mi 3 in Pastor Letjakai Singait, Gambih Pastor khut'ah tahsan twilut ana bol tauvin ahi. Pathen in tahsan detna le lhagao pilhinna pe jing tauhen.

November 1: October 29 – November 1, 2020 sung in Changoubung Baptist Church mun'a Youth Camp chu Rev. Onkho Haokip le Pastor Jamthientlal Haokip speaker hina in lolhing tah in ana kichai tai.

November 2: Vangset umtah in Pastor Lalmintang Singson (70), Retd. Pastor KBC in tahsa hinkho eina mollem san tauve. Ama chenna MB Saichang, KBC No. 11 mun'ah Rev. Pillar Paosei, Gambih Pastor kin thempu hinna in vuilemna ana um in ahi. Office Secretary mi thum chule worker phabep injong ana op uvin ahi. Pathen in adalhah insung mite lungmonna le lhamonna pe jing tauhen.

November 4: Rev. Dr. M. Thongkhosei Haokip le inneipi 25th Wedding Anniversary, KBC Campus, Imphal mun'a Rev. Tonglet Haokip, kinthempu hinaa KBC Workers le ajiteu toh lolhing tah a ana kimangkhom in ahi.

November 5: KBC Centre Church Tujangvaichong Pastor Quarter kum 2002 a ana kisa chu athah sahdoth nadin alui chu tuni Nov.2, Monday ni in aki phelha tan ahi.

November 6: Vangset umtah in tu le tua Haokip Veng a cheng Pu Thangtong Haokip (68), Pi Felkim (KBC Gambih No. 1 Women Department Chairperson) inneipu chun Phallha Nisim 6,2020 nikho in tahsa hinkho eina dalha tauve. Pathen in adalhah insung mite lungmonna le lhamonna pe jing tauhen.

November 12: Vangset umtah in Pu Thangtinlen Kipgen, Centre Church Sapormaina, KBC Gambih No. 4 chun tahsa hinkho eina mollem san tauve. Pathen in adalhah insung mite lungmonna le lhamonna pe jing tauhen.

November 12: Vangset umtah in Molvailup Baptist Church, KBC Gambih No. 17 a um Pu Zamson Haokip chun tahsa hinkho eina mollem san tauve. Pathen in adalhah insung mite lungmonna le lhamonna pe jing tauhen.

November 13: Vangset umtah in Zion Village, Centre Church Molnoi Area mi in tahsa hinkho eina mollem san tauve. Pathen in adalhah insung mite lungmonna le lhamonna pe jing tauhen.

November 13: Vangset umtah in Songjang Baptist Church, KBC No. 6 mun na cheng Pu Hengoulén Kipgen in tahsa hinkho eina mollem san tauve. Pathen in adalhah insung mite lungmonna le lhamonna pe jing tauhen.

November 14: KBC Centre Church M. Thingjabuong Youth ho Jacob Taona Mol ah An-ngol in aga mang khom uvin ahi.

November 14: Centre Church Canaan Veng, KBC No. 8 chun Centre Church Chassad mite vilna le taopehna ana nei uvin ahi. Pathen in athilpha bolnau phatthei boh jing uhen.

November 15: KBC Centre Church Canaan Veng, Imphal chun Rev. Lettinlal Chongloi speaker hina in Revival Programme ana mang uvin ahi.

November 15: Twilelon Baptist Church, KBC Gambih No. 12 mun'ah Lholhun Kut lolhing tah in ana mang chai tauvin ahi.

November 15: KBC No. 12 Youth Camp lolhing tah in ana kichaiyin ahi. Camp a jao mi 29 in Pastor Lhunkhongam Haokip, Gambih Pastor kinthempu hina in tahsan twilut ana nei uvin ahi.

November 12-15: KBC Centre Church Haolai Khopi KBC Gambih No. 8 REVIVAL CAMP chu Pastor Mangcha Tuboi le Evan. Paolam Kipgen Speaker hina in lolhing tah in ana kichaitai.

November 16: Vangset umtah in Pa Lampu DOUNGEL Centre Church Tuibong, KBC No.8 chun tahsa hinkho eina mollem san tauve. Pathen in adalhah insung mite lungmonna le lhamonna pe jing tauhen.

November 16: Gambih No. 1 Women Department in Rev. Tunlal Haokip, Gambih Pastor makaina in Shalom Theological Seminary vilna le thilpha bolna aganei uvin ahi.

November 14-16: Moreh Baptist Church, KBC Gambih No. 15 Revival Programme chu Rev. Thanglen Haokip, Pastor Haopu Haokip, Evan. Chingboi Chongloi speaker hina in lolhing tah in ana kichai tai.

November 19: Haolenphai Baptist Church, KBC Gambih No. 15 a um Ng.Nemjalhing Haokip chu hou dan theng'a jinei ding in Rev. Thanglen Haokip, Gambih Pastor in lhadohna ana neitai.

November 20: Mr. Lamgoulen Khongsai le Ms. Doituailou Haokip chu Centre Church B. Vengnom, KBC Gambih No. 8 mun'ah Rev. Lunjalen Khongsai kin thempu ina in hou dantheng in kikhutsina ana neilhon tai. Convention thalheng in Rev. Pillar Paosei in houlimna ana neiyin ahi.

November 21: Songjang Baptist Church (KBC No. 6) mun'ah Nepali Pathen thu seipehna aum in ahi. Speaker in Rev. Jiteen aki mang cha in ahi.

November 22: Centre Church Tujangvaichong, KBC No.6 in Sunday school kumlhun themvetna lolhing tah in ana chai tauvin ahi.

November 25: Kuki Baptist Convention Gambih No 3 Kum 25 lh-inna Silver Jubilee Celebration, Molkon Bazar mun'ah lolhing tah in ana kimang chaitai. Convention lamkai phabep le worker phabep injong kilom tah in aga op uvin ahi.

November 25: Mr Houkthothang Baite@ ST Thangboi Chief of Molngat Village le Miss Mongneilam Baite@Mongpi chu Lungil Baptist Church, KBC Gambih No. 11 mun'ah Rev. Pillar Paosei Haokip kinthempu hina in hou dan theng in janggop in ana um lhon tai.

November 25: Pastor Thangneo Haokip le aloinu Choinu @Devjani in anupate Insung mi Meitei non Christian ho Lhagao mangding pohnat najal in amani sakhaosoh in Sochatna Gospel Thupha thu Centre Church NGV mun'ah ana seipeh lhon in ahi.

November 26: Mr Janggoumang Haokip le Nemngaihat chu Centre Church B. Vengnom, KBC Gambih No. 8 muna'h Rev. Lunjalen Khongsai kinthempu hina in janggop in ana um lhon tai.

November 26: Pator David Jangkhogin Chongloi, s/o Pastor Ch. Chunglet chu Deborah Chinneilam Khongsai toh Centre Church Kangpokpi mun'ah Rev. Letpu Kipgen kinthempu hina in janggop in ana um lhon tai. Hiche kin u Office thalheng in mi thum chule worker phabep in pan ana lauvin ahi.

November 27: Twinom Baptist Church, KBC Gambih No. 8 a Men Department in Silver Jubilee lolhing tah in ana mang chai tauvin ahi.

November 27: New kelthelmanbi Baptist Church, KBC Gambih No. 7 Houin Thah kisa chu Pastor Letkhoson Haokip kin Thempu hina in thenso ana hitai.

November 27: Mr. Jamtong Haokip le Ng Hoithenkim Baite chu New Songjang Baptist Church, KBC Gambih No. 14 muna'ahh Pastor Lamkhogin Haokip, Gambih Pastor kinthempu hina in janggop in ana um lhon tai.

November 27: Vangset umtah in C. Zoulen (KBC No. 2) Haosapu Pu Demmang Kipgen chun tahsa hinkho eina mollem san tauve. Pathen in adalhah insung mite umpi jing tauhen.

November 28: Gambih No. 21 Gambih mopoh na noiya An-ngol taona mi 230 vel in pan alah in nom tah in Teijang Baptist Church mun'ah na mang chai tuavin ahi.

November 28: Maokot Baptist Church, KBC Gambih No. 6 mun'ah gambih An-ngol Taokhomna lolhing tah in ana kichai tan ahi.

November 28: Centre Church Canaan Veng, Imphal Nute in Lydia Resource Center vilna le kisuhhalna kin lolhing tah in ana mang chai tauvin ahi.

November 28: Centre Church New Lambulane Imphal chun Elijah Prayer Mount, Gothol mun'a Prayer Cabin khat asah uchu ana thenso tauvin ahi.

November 28: KBC Office Secretary phabep in Gambih No. 13 Executive chengse toh Khangbarol mun'ah kimutona le kiviltona ana nei uvin ahi.

November 28: Vangset umtah in B. Vengnom Centre Church, KBC Gambih No. 8 a um Pu Jampao Kipgen in tahsa hinkho eina mollem santauve. Pathen in adalhah insung mite lungmonna pe jing tauhen.

November 29: Pathen phatna jal in Gothol Baptist Church, KBC Gambih No. 8 Houin thah kisa chu Rev. Dr. Thangboi Chongloi, Gambih Pastor Kinthempu hina in thenso ana hitai.

November 29: KBC Gambih no. 7 hopsunga um S. Laijang b/ch. akan sopi mi 13 in tuni nisim 29th Nov. 2020 nikhon gambih pastor khut'a baptize achang tauvin ahi.

November 29: Kotlen Baptist Church KBC Gambih No 6 mun a khangthah mini nungah khat le gollhang khat in Pastor Letminlal Khongsai, Gambih Pastor pa khut a tahsan tuilutna ana nei lhon in ahi.

Kuki Christian lah'a amasapenho

1. 1977 kum in Hengbung Houbung mun a KBC Women "Fellowship" masapen ana kibolle.
2. KBC Youth "Fellowship" masapen 1973 kum in Kheng-jang Houbung mun'a ana kibolle.
3. 1960 kum in "Pakai Jesu Hinkho le Athuhil" simmun mangcha in KBC Sunday School masapen ana kibol pan e.
4. 1970 kum in Kangchup Bunglow mun KBC Worker "Retreat" masapen ana kibol e.
5. 1974 kum in Pu Paokholun Haokip Choir Director masapen hina in KBC "Choir" ana kiphtudoh e.
6. 1981 kum in KBC Houbung La with Tonic Solfa masapen chu Rev. Hawlngam Haokip hapanna jal in Baptist World Alliance (BWA) ten 20,000 USD ahinpe un, hiche sum chu CBCNEI Office a Christian Literature Centre (CLC) Guwahaty mopohna in copy 10,000 ana kitatdoh in September 2, 1981 nikho in MBC Imphal a Pu Pakia Mathu, General Manager, Christian Literature Centre (CLC) Guwahaty in thensona ana nei in ahi.
7. 1977 kum in KBC Kivaipohna sunga Internal Audit masapen ana kibol e.
8. 1983 kum in KBC Kivaipohna a "Evaluation Committee" ana kisemdoh masapen in ahi.
9. 1982 kum in Pu M. Thangkhosei Haokip Manager masapen hina in KBC Farm masapen Kholep gam a ana kiboldoh e.
10. 1982 kum in Litan Sareikhong mun a KBC Natong ho le ajiteu Training masapen anakibol e.
11. 1968-1978 sung in Pu S.K. Loukhosei KBC Finance Secre-tray masapen in ana kipan sah e.

LHAGAO HINKHO PUIHING THEIHO

01. *Lhunna ding lhunna ding'a eima kihambolna le kitim themna chu hung ngaicha ahi.*
02. *Thil tamtah na bol jeh a thil tamtah na jou tai tina hilou ahi. Na toh le machalna kiti teni hi achom chom ahi.*
03. *Mi kimkhat in ongman louvin aum uvin ahinlah machalna khat-cha neilouva boi jong aum in ahi.*
04. *Mitamtah in tu idinmun uhi imoh lhun lhun dan uvin agel jiuvin ahi.*
05. *Ahinlah tua ilhunna hi imohlhun lhun u ahipon, ihinkhou man dan akon hichemun hi ichan cheh u ahi.*
06. *Na toh dinga lom na toh (Na mission) na toh tengleh nanatoh-naa na min jong na haimil leu ding ahi.*
07. *Ahinlah na natohna na title na het jing thei nalai leh na mission chu dihlou lai hiding ahi.*
08. *Natoh ding hol hih in, na mission/ na kin dihtah joh kitoh in.*
09. *Na Title bouva na natoh leh na tohna mun akikhel tengleh ima-cha na bol thei tahlou ding ahi.*
10. *Mi tamtah in, asum tam dan, akum tamdan le athep dan a thu kitan ahi, Pathen invang iti kibol em chule ipia kimang cha em tia thu atan ding ahi.*
11. *Vannoi leisetna bol ding hetalouva hinkho na man khah le avangse pen khat na hi ding ahitai.*

GAMBIH 18 TAHSAN TWILUT

September 13, 2020 nikho in Khoding Baptist Church, KBC Gambih No. 18, Gambih Center mun'ah mi 14 in Pastor Letjakai Singsit, Gambih Pastor khut'ah tahsan twilut ana bol tauvin ahi. Pathen in tahsan detna le lhagao pilhinna pe jing tauhen.

- Pastor Letjakai Singson

KBC Gambih No. 3 Silver Jubilee



Nisim 25 November 2020 nikho chun KBC Gambih no 3 kum 25 Ihin na Silver Jubilee kipah tah in Molkon Bazar Gambih campus a anakimang tan ahi. Kin Thempu Rev Henjalen Doungei Gambih pastor in Jubilee song hondoh na aneijin, Jubilee message Rev Dr M. Thongkhosei Haokip General Secretary KBC in anapen ahi. Souvenir thenson Pastor Seiminlen Haokip Centre Church Salem Saikul apangin chule Jubilee Hall thenson Pastor Seikhohlen Kipgen Pastor Centre Church Molkon Bazar apang in ahi.

Gambih no 3 hi 1995 kuma (L) Rev. Hempao Haokip gambih pastor hilai a anakisem doh ahi. Tule tuhin Centre Church ni pannan houbung 9 akiloi khomin ahi. Hiche gambih hi Pathen phatthei na chang gambih khat ahin, Convention worker 12 tuhin aumin KBC gambih 21 laha Employees tamna pen gambih khat hidin tahsan aume. Ngailut jalla hung kalsong mihem 2000 lamin ngailut ankong anakisoh khom e.

-Rev. Henjalen Doungei, Gambih Pastor

KIPA THU PHONNA

Tuni Nisim 14 11 2020 nin KBC Centre Church Canan Veng, KBC Gambih No. 8 a um houbung mi ten Chassad kho le Houbung Vilna ahung nei vin Rev paolun church pastor pa le aloiho 10 30am don in ahunglung vin Housa ho le Houbung lamkai ho le youth club lamkai hon an nehkhom pi na le kikhop pina akinei jin amahon jong kho le houbung chuleh youth club ho tilkhon na le lhamon na le kitho pina anei u vin kipa aumleh in ahi pathen in Houbung mite athil pha bolnao chung ah phatthei bohjing tao hen.

-Chassad Khomite

KIPA THUPHON

Tuni 16th November 2020 (Monday) ni in KBC Gambih No.1 nute ho (Women Dept.KBC No.1) hon Gambih No.1 Pastor pa Rev. Tunlal Haokip makai na in STS ahung vil uvin ahi. Nute hon STS akhoh sah dan u le KBC in Theological College khat sun sun inei u sem hoiding poimo asah dan u aseu uvin, hitoh lhon chun STS khantouna dingin Dangka Rs.60000 (sixty thousand) apeu vin ahi. Gambih Pastor pan lungmon umtah taona STS a dingin amangin ahi. Hitobanga Gambih No.1 nute hon lungel le natoh ahin nei jeh uvin STS a kon in kipa Thu sangtah in ahung kisei in ahi. Gah geldoh thei Chu Gambih No.1 nute hin 2018 kum a Jong Chu STS vil nale kithopina ana nei sau ahi tai. Pathen in KBC No.1 nute kiloikhomna phatthei boh jinghen lang mi kithopi jou jingin hung um Jing Tao hen.

Shalom Theological Seminary (STS) in First Semester Examination akichaito kilhonin, 19th November, 2020 jingkah a pat nilhah chanin STS Annual Sports momtah in anakibolin, Annual Sports akichaito lhon a Second Semester Class kipan kit ding ahitai.

Chule, tuchan a STS share anapelou lai houbungho jousen lungset tah in kumlhun kah in petheng teiyute, tin Pakai minin temna le taona avelin ahung kinei kit in ahi.

-Rev. Dr. Paokhohao Haokip, Principal STS

KIPAPINA PASTOR DAVID JANGKHOGIN CHONGLOI

Pastor David Jangkhogin Chongloi, Pastor Centre Church Haolai Khopi in Pathen hou dantheng'a jineina ahin nei KBC Thuso Editorial Board in jong sangtah in kipathu aki-phong in ahi. Pathen in mailam'a phatthei boh jing ta-hen.

GOTHOL HOU-INN THAH THENSO HITA



Tuni nisim 29th November 2020 (Sunday) nikhon Gothol Baptist Church, KBC Gambih No. 8 Houin thah kisa chu Rev. Dr. Pao-inthang Chongloi, Gambih Pastor in Pa Pathen Chapa Pathen le Lhagao Theng Pathen min in hondohna le katdohna ana nei tan ahi. Houin lutna kin achun Convention lamkai phabep le Gambih lamkai phabep jong ana jao uvin ahi.

- Pu Hegin Haokip, Gambih Chairman, KBC No. 8

(L) PASTOR LALMINTHANG SINGSON HINKO THUSIM



(L) Lalintang Singson hi lhakeh tasa (L) Pu Kamjakhup Singson le (L) Pi Ngaijahoi Singson laigilga ahin 25th Dec.1950 in Bualtang (Phaipheng) vil-lage Henglep Sub-division ah ana peng in ahi.

Ama in penpi pasal 6 le numei 2 anei in ahi.1979 kum in aum-talou (L) Tinkhonem Touthang toh Pathen houdan theng in

ana ki cheng lhon in, Pathen goupeh chapa 3 leh chanu 3 ana nei lhon in ahi. Ahin vangset umtah in 1995 kum in asen jin ana mollem san tai.

1996 kum in chate khankho ding le inchen gelkhohna jal in MB Saichang kho muna um (L) Pu Jamsei Haokip chanu Pi Nengneichong Haokip toh ahung kicheng lhon in hiti chun Pathen goupeh chanu 2 leh chapa 1 ahin neibe kit in chate agom in Pathen goupeh chanu 5 le pasal 4 anei in ahi. Hitichun Pathen lenggem natohna hihen inchen sem na lam hijong leh pan ahin lakhom lhon in ahi.

Phat leh nikho hung che dungjui in atahsa damthei na lam ahung lhasam lseh tan, Pathen leh Houbung mi ho deisah na jal in Convention lam a natoh akichol nung in 2019-2020 Houbung Head Deacon ding in lhen doh ana hin, ahin atoh ban tong lhung joutalou in 1st Nov 2020 ni dam ding ngaichat na jal in CCpur Distt. Hospital ana kijon in hin lah dam doh joutalou in 2nd Nov 2020 4:30AM vel in aleiset hikho gimna dalhan ana che masatai. Pathen an ahin toh na ho:

KUKI CHRISTIAN ASSOCIATION

- 1). Khengjang village CCpur Dist. Evangelist teacher 1979—1981.
- 2). M.B Saichang Vill. Evangelist teacher 1982 1984
- 3). Twikong vill Evangelist teacher 1985 1987

KUKI BAPTIST CONVENTION

- 1) Teacher Vangphat School Twinou
- 2) Cashier Office.
- 4) Pastor na ahin toh a kon in mun chom chom ah posting ana chen ahi.
- 5). Gambih No. 7
- 6). Gambih No. 12
- 7). Gambih No. 4
- 8). Centre Church Chassad
- 9). Centre Church Haokip Veng
- 10). Centre Church Cannan veng



68th GENERAL ASSEMBLY KOUNA

Amun : B. Vengnom Centre Church, KBC No.8

Lhunkimni : 25th January 2021

Nipini : 26th – 28th January 2021

Kikhenni : 29th January 2021

Pakaija ngailut umtah, KBC General Assembly member ho jouse, min ngei chungnung i-Pakaiju Jesu Christa minin kangailut-na chibai kahin peuve. Calendar of Events, dungjuija chung a kipe mun le nikho sunga hi 68th KBC General Assembly umding ahi. Hijeh chun, member ho jouse ikiloikhomnau ngailutna jal a thon-louva hungpang cheh dingin temna le hetsahna kahin neije.

Assembly Member dingho chu:

1. Houbung thalheng Baptised member 100 changei thalheng 1, Baptised Member 100-200 chan thalheng 2, Baptised member 200 chunglam ahileh thalheng 3 hiding ahi.
2. Convention Workers General & Missionary & Evangelists ho,
3. Convention level a lo beija kigoi (Elected) ho jouse (President, Vice-President, Assembly Secretaries, Auditors, Committee/Board hoa member jouse)
4. Gambih Chairman, Secretary, Gambih Department Chairman le Secretary ho,
5. Pensioner ho, KBC Deputation ho jouse,
6. KBC Ministry – Women, Men, Youth hoa Work Committee ho,
7. Ex-President ho,
8. Member At-Large mi 2,

(Rev. Dr. M. Thongkhosei Haokip)

General Secretary

Kuki Baptist Convention (I)

1. Assembly a dinga thil angaicha jouse eiman kipoh cheh ding ahi.
2. Registration Fee hi mikhat na Rs, 1000/- hiding ahi.
3. Pension lhahding jong mi 4/5 aum e.
4. Ordination le Licentiate bolding agoma mi 23 aum e.
5. Kumdanga banga Assembly session sung goh hilouva jingkah/nilah houk homna ima a jong pang cheh dingin hung kigo cheh un.
6. Lhunkimma akilhun kimcheh banga kikhen nia kikhen khom cheh ding aphai.
7. Tukum hi lamkai (Honorary Officer) ho kilhenna kum jong ahi.

LUNGHEMPINA



(L) PU JAMPAO KIPGEN

Pu Jampao Kipgen, B. Vengnom in eina mollem sanna chung uva KBC Thuso Editorial Board in jong nasatah in lunghempina thu ahung kiphong in ahi. (L) Pu Jampao Kipgen hi KBC ding'a Peon kila masapen anahi in 1981-1983 sung Peon mopohna analah ahi. Pathen in adalhah insung mite lungmonna pe jing tauhen.



(L) PASTOR LALMINTHANG SINGSON

Pastor Lalminthang Singson, Retd Pastor, KBC in eina mollem sanna chung uva KBC Thuso Editorial Board in jong nasatah in lunghempina thu ahung kiphong in ahi. Pathen in adalhah insung mite lungmonna pe jing tauhen.

Tuilelon
Baptist
Church
khomiten
Pathen
henga
thangvahna
Lholhun
Kut ana mang unvin ahi.



Mission Department Lamkaihon Gambih No 21 tour
anabolna uva Gambih Lamkai hoto limlahna.



Pastor Jangkhogin David Chongloi,
Pastor Haolai Khopi Centre Church in
Jineina ana neitan ahi.

Post Regd. MNP/81
Regd No. 18134/88

KBC ADMINISTRATIVE OFFICE



Development for Human Potential (DHP) tetoh KBC Office mun a Consultation programme ana kineikhom



Retired Pastor Holthang Haokip aumnamun MB Saichang a worker hon vilna ana nei uve.

If undelivered, please return to
The Editor. KBC Thuso
KUKI BAPTIST CONVENTION
Opp. DM College, Imphal - 795 001
Contact: 9862633173